

‘Nos meta ta pa evita traficacion humano’



ORANJESTAD – E documentario ‘Promesa falso’ ta un forma di pelicula local cu lo ser muestra na Aruba, pa asina conscientisa y habri wowonan di comunidad pa evita traficacion humano.

Paula Nahr di Switch foundation a splica nos cu e idea aki a nace na 2015 ora Cindy Wernet un docente, a bira miembro di Kiwanis young professional. Sra. Wernet a acerca sra. Nahr y a comparti e gran deseo pa Switch foundation traha un video di 15 minuut cu lo duna informacion di traficacion di humano.

E documentario ta splica segun un ‘reacting’ di e storia berdadero. “Nos ta bay muestra henter e proceso di con un asina yama ‘loverboy’

ta conquista e mucha mulhe, namora di dje y e ta duna un promesa falso, pa despues hunga cu e persona psicologicamente pa despues cuminsa bende e mucha mulhe pa placa. Ni con sabi of fuerte bo ta cualkier persona por cay den e trampa di un loverboy.”

Segun sra. Nahr, e idea a bin ora un sobreviviente di e explotacion sexual naci na Merca, a bin Aruba pa duna un presentacion na scol tocante conscientisacion. El a aclara cu e presentacion a haci un gran impacto y cu e persona aki kier a comparti su storia cu henter Aruba.

“E sobreviviente aki a logra convence Kiwanis young professionals y a aproba e proyecto. Nan a comunica cu mi persona pa asina haci e proyecto aki uno educativo

paso ya caba Switch Foundation a yega di haci proyectonan asina encuanto di habri wowo di comunidad.”

Sra. Nahr ta aclara cu pe tabata un honor anto el a keda sorprendi paso e no a pensa riba e tema di traficacion di hende na Aruba. “Comunidad di Aruba ta pensa cu e no ta algo cu lo por sosode aki.”

“Na cuminsamento di e proyecto, e presupuesto tabata chikito”, sra. Nahr ta remarca. “Mi tabata sa cu e lo ta un reto pa por logra, pero ningun momento esaki a stop e proyecto, paso mi ta kere den e poder di por influencia hende den medio di comunicacion. Nos como medio di comunicacion no ta realiza cuanto poder nos tin pa influencia hende.”

E ta splica tambe cu e tema di traficacion di hende ta asina complejo cu ora sra. Nahr a entrevista Jeannette Richardson, di departamento di traficacion di hende, mester a pasa basta bialha cerca dje pa asina por compronde y simplifica e tema pa asina personanan por compronde mas facil. Sra. Nahr ta remarca cu e tambe ta siñando tocante e tema.

“Un persona cu ta inmigra of ta ilegal ta pasa den necesidad y ta wanta abuso pa asina e por haya placa pa manda na su famia den exterior. Tin asina diferente storia y testimonionan cu ta tristo.”

Un traficado tin diferente indicadonan. “Nos ta comparti e indicadonan pa asina esunnan cu ta den comunidad por yuda nos. Si bo wak algo straño of sospechoso, bati alarma di bialha.”

E ta aclara cu nan ta duna training pa studiantenan cu ta bay Hulanda pa asina ta atento pa e loverboy nan aki, paso ni con inteligente e persona ta ‘bo ta keda un ser humano emocional y nada por reemplaza amor’.

Sra. Nahr ta splica cu traficacion di humano ta parti den tres. Explotacion laboral, sexual y traficacion di organonan, pero promesa falso ta bay ‘enfoca den explotacion laboral y sexual solamente’.

E documentario –segun sra. Nahr– ta den e fase final di produccion un 90% cla. E ta remarca tambe cu pa henter comunidad di Aruba ta un privilegio di toch por biba na un isla cu ta sigur y tin libertad.

Switch Foundation

E proposito di Switch foundation ta pa conscientisa. “Nos tin video nan pa yuda den tur manera poderoso pa yega na miles di hende. E ta bisa cu na Aruba hopi temanan importante ta un taboe. “Nos ta trece e temanan aki via e video nan. Tambe nos ta pone nan riba social media pa asina tur hende tin acceso na dje y por comparti pa otro.”

Algun topico cu sra. Nahr a menciona cu a yega di traha riba dje ta adicon di droga, bullying, embarazo hubenil, violencia domestico y awo traficacion di humano, sea explotacion sexual y laboral. Pa sra. Nahr no tin un respuesta dicon e ta haci locual e ta haci, pero cu su proposito y su deseo enorme for di tempo e tabata mucha ta pa yuda haci algo pa mehora e mundo, pa mehora bida.

“Mi mama tabata un persona cu semper tabata duna na otro. Semper e tabata bisa mi pa keda humilde, no husga, no nenga, no ta importa con leu bo yega den bida, wak cada persona igual. Yuda esunnan den necesidad. Nunca lubida di esunnan cu a yuda bo y nunca spera di ricibi algo en cambio di esunnan cu bo ta yuda.”

Segun sra. Nahr su deseo for di hoben tabata pa ‘habri un fundacion’ y yuda comunidad. “Nos ta na mundo pa sirbi otro y traha hunto. Awendia hende ta hopi friu cu otro. “Mi ta spera cu e proyectonan lo duna bon informacion y asina habri wowo di comunidad y cambia nan manera di pensa.”

